

四庫全書

經部

欽定四庫全書

禮記集說卷一百四十四

宋 衛湜 撰

服問第三十六

孔氏曰案鄭目錄云名曰服問者以其善問以知有服而遭喪所變易之節此於別錄屬喪服

山陰陸氏曰退問在下著服多微辭與旨問有不盡也據問喪在上

傳曰有從輕而重公子之妻為其皇姑有從重而輕為

妻之父母有從無服而有服公子之妻為公子之外兄弟有從有服而無服公子為其妻之父母

鄭氏曰皇君也諸侯妾子之妻為其君姑齊衰與為小君同舅不厭婦也從重而輕謂妻齊衰而夫從總麻不降一等言非服差也從無服而有服謂為公子之外祖父母從母總麻從有服而無服者凡公子厭於君降其私親女君之子不降也

孔氏曰此四條明從服輕重之異言傳曰者舊有成

傳記者引之公子之妻為其皇姑公子謂諸侯之妾  
子也皇姑即公子之母也諸侯在尊厭妾子使為母  
練冠諸侯沒妾子得為母大功而妾子妻不辨諸侯  
存沒為夫之母菴也其夫練冠是輕也而妻為菴是  
重故云從輕而重謂之皇姑者此妾既賤若唯云姑  
則有嫡女君之嫌今加皇字自明非女君而此婦所  
尊與女君同故云君姑也公子之妻為公子之外兄  
弟者謂公子之外祖父母也公子被厭不服已母之

外家是無服也妻猶從公子而服公子外祖父母從母總麻是從無服而有服也經唯云公子外兄弟知非公子姑之子者以喪服小記云夫之所為兄弟服妻皆降一等夫為姑之子總麻妻則無服今公子之妻為之有服故知公子之外祖父母從母也此等皆小功之服凡小功者謂為兄弟若同宗直稱兄弟以外族故稱外兄弟也

嚴陵方氏曰此一節即釋大傳服術有六之文也故

稱傳曰以冠之

馬氏曰大傳從服有六而此言其四皆禮之可以變易者則服亦從而隆殺之有從輕而重有從無服而有服者以其人情無所嫌而伸之也有從重而輕有從有服而無服者以其人情有所嫌而屈之也先王制服人情而已矣然而服術之六從服為末而從服之中有至無服則雖禮之微者不可不辨

山陰陸氏曰公子之妻為其皇姑謂之皇姑著死而

後稱姑避小君也先儒謂春秋之義妾母稱夫人若小君在上堂稱妾下堂稱夫人天一而已矣夫妻之天也雖其父母猶降雖其舅姑猶降即妻齊衰夫亦齊衰是相報也故先王制服為妻之父母其輕重不倫如此婦之黨為昏兄弟婿之黨為姻兄弟又各謂其外家之黨為外兄弟喪服傳曰何如則可謂之兄弟小功以下為兄弟小功以下親不足言也謂之兄弟可故曰四海之內皆兄弟也公子不服其母故為

其妻之父母無服據喪服傳公子為其母練冠麻衣  
縗緣

傳曰母出則為繼母之黨服母死則為其母之黨服為  
其母之黨服則不為繼母之黨服

鄭氏曰雖外親亦無二統

孔氏曰此明繼母之黨亦是舊傳之辭

嚴陵方氏曰此雖非大傳之文然舊傳之所說故亦  
以傳曰冠之



三年之喪既練矣有朞之喪既葬矣則帶其故葛帶經朞之經服其功衰有大功之喪亦如之小功無變也

鄭氏曰帶其故葛帶者三年既練朞既葬差相似也經朞之葛經三年既練首經除矣服其功衰服麤衰也大功之喪亦如之者大功之麻變三年之練葛朞既葬之葛帶小於練之葛帶又當有經亦反服其故葛帶經朞之經差之宜也此雖變麻服葛大小同爾亦服其功衰凡三年之喪既練始遭齊衰大功之喪

經帶皆麻

孔氏曰三年之喪練祭之後又當朞喪既葬之節今  
朞喪既葬男子則應著葛帶與三年之葛帶麤細正  
同以父葛為重故帶其故葛帶三年練後男子除乎  
首其首空故經朞之葛經若婦人練後麻帶除矣則  
經其故葛經帶朞之麻帶以其婦人不葛帶故也功  
衰謂七升父之衰也經不云服其父衰而云功衰者  
經稱三年之衰則父為長子及父卒為母皆是三年

今暮喪既葬反服其服若言功衰總道三人故不得特言服父衰也有大功之喪明練後有大功之喪既葬也亦如之者亦帶其故葛帶經暮之葛經大功初死之麻變三年練後之葛首要皆麻矣故閒傳謂之重麻也大功既葬葛帶小於練之葛帶故反服練之故葛帶也又要服練之葛帶首服大功既葬之葛經麤細相似不得為五分去一為帶之差故首經進與暮之既葬同也故鄭云經暮之經是差次之宜也此

註亦主於男子其婦人之服下閒傳具釋云此雖變  
麻服葛大小同爾者大功初死之麻齊衰既葬之葛  
與初死之麻大小同也小功無變謂先有大功以上  
喪服今遭小功之喪無變於前服不以輕服減累於  
重也

橫渠張氏曰三年既練暮既葬服其功衰有大功之  
喪亦如之謂若三年既練暮大功既葬止當服其既  
練功衰不可便受以小功布也以此三年無受小功

之節練衰除則自當服以小功練衣必是煨練大功之布以為衣故有言功衰功衰上之衣也以其著衰於上故通謂之功衰必著受服之上稱受者以此得名受蓋以受始喪斬疏之衰而著之變服其意以喪久變輕不欲摧割之心亟忘於內也練衣當既葬之後受以大功之衰及既練也煨練其衰而已或既練則以大功之布而為衰或衰而加煨練此則繫其有亡也 小祥乃練其功衰而衣之則練與功衰非二

物若正大功之服則有小功之受蓋大功乃亞三年  
暮之重喪其卒哭之稅亦其稱爾若殤則不練矣練  
亦謂之功衰蓋練其功衰而衣之爾據曾子問三年  
之喪不弔又雜記三年之喪雖功衰不以弔又服問  
三年之喪既練矣有暮之喪既葬矣則服其功衰經  
意蓋謂當練而服後喪之衰即用七八升則前喪易  
忘故反七八升之衰矣又雜記有父母之喪尚功衰  
此云尚功衰蓋未祥之前尚衣經練之功衰爾知既

練猶謂之功衰者以下文云則練冠又三年之喪禮不當弔而雜記又云雖功衰不以弔

山陰陸氏曰禮父之喪既練服其功衰母之喪既葬服其功衰即有父之喪既練矣母之喪既葬服其功衰而帶以故葛帶經朞之經男子重首經朞之經則以母喪尚新故也雜記三年之喪雖功衰既練之衰也

藍田呂氏曰此功衰之喪既葬所受之功衰也故曰

經朞之經服朞功衰承朞文也蓋朞之既葬之葛輕  
於三年之練葛故帶其故葛帶三年之練除首經而  
朞之既葬未除故經朞之經朞之既葬之功衰重於  
三年之練故又服朞之功衰若三年既練遭大功之  
喪亦猶是也小功麻斷本故不變三年之練葛首也  
長樂黃氏曰練再受服經傳雖無明文謂既練而服  
功衰則記禮者屢言之服問曰三年之喪既練矣朞  
之喪既葬矣則服其功衰雜記曰三年之喪雖功衰



不弔又曰有父母之喪尚功衰而祔兄弟之殤則練冠是也案大功之布有三等七升八升九升而降服七升為最重斬衰既練而服功衰是受以大功七升布為衰裳也故喪服斬衰章賈氏疏云斬衰初服麤至葬後練後大祥後漸細加飾斬衰裳三升冠六升既葬後以其冠為受衰裳六升冠七升小祥又以其冠為受衰裳七升冠八升女子之嫁反在父之室疏云至小祥受衰七升總八升又案閒傳小祥練冠孔

氏疏云至小祥以卒哭後冠受其衰而以練易其冠而橫渠張子之說又曰練衣必煨練大功之布以為衣故言功衰功衰上之衣也以其著衰於上故通謂之功衰必著受服之上稱受者以此得名受蓋以受始喪斬疏之衰而著之變服其意以喪久變輕不欲摧割之心亟忘於內也據橫渠此說謂受以大功之衰則與傳記註疏之說同謂煨練大功之布以為上之衣則非特練中衣亦練功衰也又取成服之初衰

長六寸博四寸綴於當心者著之於功衰之上是功衰雖漸輕而長六寸博四寸之衰猶在不欲哀心之遽忘也此說則與先儒異今並存之當考

涑水司馬氏曰古者葬既練祥禫皆有受服變而從輕今世俗無受服自成服至大祥其衰無變故於既葬別為家居之服是亦受服之意也

麻之有本者變三年之葛既練遇麻斷本者於免經之既免去經每可以經必經既經則去之

鄭氏曰有本謂大功以上也小功以下澡麻斷本既練雖無變緣練無首經於有事則免經如其倫免無不經經有不免其無事則自若練服也

孔氏曰大功以上為帶者麻之根本并留之合紉為帶如此者得變三年之練葛若小功以下其經澡麻斷本是麻之無本不得變三年之葛也言變三年葛舉其重者其實葛之葛有本者亦得變之矣斬衰既練之後遭遇麻之斷本小功之喪雖不變服於小功

喪有事於免之時則為之加小功之經如平常有服之倫類也既免去經謂小功喪斂殯事竟既免之後則脫去其經也每可以經必經者謂小功以下喪當斂殯之節每可以經之時必為之加麻不應經之時則去其經自若練服也鄭註免無不經者於免之時必著經則大斂小斂之節衆主人必加經也經有不免者謂葬後虞及卒哭之節但著經不免以服成故也

嚴陵方氏曰本謂麻之根也大功以上之帶則不斷之以示其重焉故可以變三年之葛

山陰陸氏曰喪服小記曰下殤小功帶澡麻不絕本此不言小功而言斷本為是故也

小功不易喪之練冠如免則經其總小功之經因其初葛帶總之麻不變小功之葛小功之麻不變大功之葛以有本為稅

鄭氏曰稅亦變易也小功以下之麻雖與上葛同猶

不變也此要其麻有本者乃變上爾雜記曰有三年之練冠則以大功之麻易之唯杖屨不易也

孔氏曰小功以下之喪不合變易三年喪之練冠其暮之練冠亦不得易也如當總小功著免之節則首經其總與小功之經所以為後喪總經者以前喪練冠首經已除故也上經云小功不易明總不易下經云總小功之經兼言總者恐免經不及總故也前經已云於免經之此經又云如免則經者前經但云經

不云練冠恐小功以下不得改前喪練冠故重言之也因其初葛帶者言小功以下之喪要中所著仍因其初喪練葛帶上文云朞喪既葬則帶練之故葛帶此小功以下之喪亦著練之初葛帶不云故而云初者以朞初喪之時變練之葛帶為麻朞既葬之後還反服練之故葛帶故言故也謂其小功以下之喪不變練之葛帶故云初葛帶也總之麻不變小功之葛小功之麻不變大功之葛者謂以輕喪之麻本服既



輕雖初喪之麻不變前重喪之葛也以有本為稅者大功以上麻經有本者得稅變前喪也總與小功麻經既無本不合稅變前喪故所總之麻不變小功也註云此要其麻有本者乃變上耳者麻有本謂大功以上麻經有本為重下服乃變上服大功得變朞朞得變三年也引雜記者欲明大功之麻非但得易朞喪之葛亦得易三年練冠之經也

嚴陵方氏曰麻以有本者為重故得變易而稅焉以

此易彼則彼得以息故曰稅稅猶典路說駕之說

山陰陸氏曰於此言小功嫌下殤之小功不斷本可以易喪之練冠稅者脫也然則所謂小功不稅嫌言不服著矣

殤長中變三年之葛終殤之月筭而反三年之葛是非重麻為其無卒哭之稅下殤則否

鄭氏曰謂大功之親為殤在緦小功者也可以變三年之葛正親親也三年之葛大功變既練齊衰變既

虞卒哭凡喪卒哭受麻以葛殯以麻終喪之月數非重之而不變為殯未成人文不緝耳下殯則否言賤也男子為大功之殯中從上服小功婦人為之中從下服總麻

孔氏曰殯長中者謂本服大功今降在長中殯男子則為之小功婦人為長殯小功中殯則總麻如此者得變三年之葛也著此殯服之麻終其月筭數如小功則五月總麻則三月著麻月滿還反三年之葛也

言服殤長中之麻不改是非重此麻也以殤服初死服麻已後無卒哭稅麻服葛之法以其質略無文飾之繁數故也註云三年之葛大功變既練者則雜記云三年之練冠以大功之麻易之是也云齊衰變既虞卒哭者則下閒傳云斬衰之喪既虞卒哭遭齊衰之喪輕者包重者特是也男子為大功以下喪服傳文

山陰陸氏曰下殤則否言為其無卒哭之稅則雖小

功有卒哭矣

君為天子三年夫人如外宗之為君也世子不為天子服

鄭氏曰外宗君外親之婦也其夫與諸侯為兄弟服  
斬妻從服朞諸侯為天子服斬夫人亦從服朞喪大  
記云外宗房中南面世子不為天子服遠嫌也不服  
與畿外之民同也

孔氏曰君謂列國諸侯之君為天子三年也諸侯夫

人為天子如諸外宗之婦為君也諸侯外宗之婦為君  
君暮則夫人為天子亦暮也諸侯世子有繼世之道  
所以遠嫌不為天子服也鄭註外宗君外親之婦其  
夫既是君之外姓其婦即是外宗也云其夫與諸侯  
為兄弟服斬謂在於他國諸侯既死來為之服當尊  
諸侯不繼本服之親故服斬也案熊氏曰凡外宗有  
三案周禮外宗之女有爵通鄉大夫之妻一也雜記  
云外宗為君夫人猶內宗是君之姑姊妹之女舅之

女從母之女皆為諸侯服斬為夫人服朞是二也此文外宗若姑之子婦從母之子婦其夫是君之外親為君服斬其婦亦名外宗為君服朞是三也內宗有二周禮云內女之有爵謂其同姓之女悉是一也雜記云內宗是君五屬之內女是二也引喪大記證外宗之義也

君所主夫人妻大子適婦大夫之適子為君夫人大子如士服君之母非夫人則羣臣無服唯近臣及僕驂乘

從服唯君所服服也

鄭氏曰君所主夫人妻大子適婦言妻見大夫以下亦為此三人為喪主也士為國君斬小君朞大子君服斬臣從服朞大夫不世子不嫌也妾先君所不服也禮庶子為後為其母總言唯君所服伸君也春秋之義有以小君服之者時若小君在則益不可

孔氏曰夫人妻大子適婦此三人既正雖國君之尊猶主其喪也非此則不主也大夫無繼世之道其子



無嫌得為君與夫人及君之太子著服如士服也君  
母非夫人君為之服總則羣臣為之無服君母是適  
夫人則羣臣為服朞也近臣謂閹寺之屬僕御車者  
也驂車右也君之母非夫人貴臣乃不服此諸臣賤  
者隨君之服故云從服君服總此等人亦服總故云  
唯君所服服也天子諸侯為妾無服唯大夫為貴妾  
服總故鄭註云妾先君所不服也庶子為父後則為  
母無服故喪服記云公子為其母練冠麻衣縗緣令

君得著總麻故鄭云唯君所服伸君也鄭既言正禮  
又引春秋之時不依正禮有以為小君之服服其妾  
母者文公四年夫人風氏薨是僖公之母成風也又  
昭十一年夫人歸氏薨是昭公之母齊歸也皆亂世  
之法穀梁傳曰魯僖公立妾母成風為夫人是子爵  
於母以妾為妻非禮也左氏說成風妾得立為夫人  
母以子貴禮也鄭從穀梁說

山陰陸氏曰言妻非見大夫以下大夫以下為此三

人為喪主不必見也曲禮曰公侯有夫人有世婦有妻有妾

公為卿大夫錫衰以居出亦如之當事則弁經大夫相為亦然為其妻往則服之出則否

鄭氏曰弁經如爵弁而素加經也不當事則皮弁出謂以他事不至喪所

孔氏曰君為卿大夫之喪成服之後著錫衰以居以他事而出亦著錫衰其首則服皮弁當事謂君行往

弔卿大夫當大斂及殯并將葬啓殯等事則首著弁  
經身衣錫衰若於士雖當事首服皮弁大夫相為亦  
如君於卿大夫不當事則皮弁當事則弁經也為其  
妻謂公於卿大夫之妻及卿大夫相為其妻往臨其  
喪則服錫衰不恒著之以居若他事出則不服也當  
殯斂亦弁經

山陰陸氏曰當事則弁經者據此王為三公六卿錫  
衰大夫士疑衰其首服蓋當事而後弁經也大夫相

為亦然者雜記曰大夫哭大夫弁經與殯亦弁經為其妻往則弔也弔而服之弔而出則除之喪服傳曰大夫弔於命婦錫衰命婦弔於大夫亦錫衰

新安朱氏曰古人君臣之際如君臨臣喪坐撫當心要經而踊今日之事至於死生之際忽然不相關不啻如路人所謂君臣之義安在祖宗時於舊執政亦嘗親臨自渡江以來一向廢此看古禮君於大夫小斂往焉於士既殯往焉何其誠愛之至今乃忽然古

之君臣所以事事做得成緣是親愛一體

凡見人無免經雖朝於君無免經唯公門有稅齊衰傳  
曰君子不奪人之喪亦不可奪喪也傳曰罪多而刑五  
喪多而服五上附下附列也

鄭氏曰見人謂行求見人也無免經經重也稅猶免  
也古者說或作稅有免齊衰謂不杖齊衰也於公門  
有免齊衰則大功有免經也列等比也

孔氏曰以經重縱往朝君亦無免稅於經也唯至公

門已有不杖齊衰則脫去其衰經猶不去也若杖齊衰及斬衰雖入公門衰亦不稅也其大功非但稅衰又免去經也君子以己怨物不可奪人喪禮故君所以許臣著經亦不可自奪喪所以己有重喪猶經以見君申喪禮也罪之與喪其數雖多其限同五其等列相似故云列也傳是舊記引以明之

山陰陸氏曰經重也以經該之下云唯公門有稅齊衰則此言斬衰可知然則君子不奪人之喪亦不可

奪喪謂奪所重者也唯公門有稅齊衰言有有不稅也大夫以上不稅據士唯公門稅齊衰凡所謂稅皆暫釋喪服反吉服若康王麻冕黼裳是也列若令例矣

馬氏曰法者所以齊天下之過失然民之過失浩繁而不勝齊也故法不可以不省禮者所以辨天下之親疏然人之親疏輕重之不易辨也故禮不可以簡是故制為五刑以斷其罪而罪多者有非五刑所屬



則隨時而參酌之列為五服以定其喪而喪多而服  
五上附下附列也故有從輕從重有服無服之別焉  
蓋先王之制必以五數舉其大者而略言之五典五  
禮五聲五色五味五行日用不可闕一焉易曰天數  
五地數五王者之政天地而已

嚴陵方氏曰上附下附列也言上下各有所比附而  
為之等列也

閒傳第三十七

孔氏曰案鄭目錄云名曰閒傳者以其記喪服之間輕重所宜此於別錄屬喪服

斬衰何以服苴苴惡貌也所以首其內而見諸外也斬衰貌若苴齊衰貌若梟大功貌若止小功緦麻容貌可也此哀之發於容體者也斬衰之哭若往而不反齊衰之哭若往而反大功之哭三曲而偯小功緦麻哀容可也此哀之發於聲音者也

鄭氏曰有大憂者面必深墨止謂不動於喜樂之事

三曲一舉聲而三折也。偯聲餘從容也。梟或為似

孔氏曰：此明居喪外貌輕重之異。豈是黧黑色止平，  
停不動也。大功轉輕，心無斬刺，故貌不為之變。又不  
為之傾。若止於二者之間，衰因鍛布帶屨亦輕，其經  
色用梟同者，自別表義耳。小功總麻，其情既輕，哀聲  
從容於理可也。

嚴陵方氏曰：自大功至總，皆有衰止，以稱齊斬者，以  
其為凶服之重故也。凡物精而致者，謂之功粗而略。

者謂之沽大功小功之布比斬衰齊衰之布則稍精  
矣故皆謂之功大功之服九月比小功為大故以大  
稱之小功之服五月比大功為小故以小稱之總麻  
則服之細其質則麻也故又以麻稱之自小功以上  
至於斬衰無非麻之所為者止以之稱總則以其為  
凶服之最輕其細至於十五升功又不足以言之也  
特有以別於絲而已此五服之辨也苴蓋子麻也以  
之為布凡物精為美麤為惡故曰苴惡貌也蓋孝子

之情在內者既極其哀則形於外也亦為之不美故  
斬衰則服苴以表之故曰所以首其內而見諸外以  
其所表如此而貌亦宜如之故曰斬衰貌若苴梲亦  
苴也蓋謂牡麻爾其為布稍精於子麻上言斬衰服  
苴則知齊衰而下服梲矣且齊衰既以緝而齊其下  
為義則其服緝之梲固亦宜矣其服如此貌亦宜如  
之故曰齊衰貌若梲以其哀既殺於斬衰故貌不若  
苴之惡也往而不反言氣欲絕而不能生也俛則哀

之餘聲也夫哀之所感天性然也孝經言喪親曰哭  
不偯故此至大功始有偯也哀容則其哀從容而不  
迫

馬氏曰喪禮與其哀不足而禮有餘也不若禮不足  
而哀有餘也故先王因哀以制禮則禮有隆殺因禮  
以見哀則哀有小大凡喪事以哀為主閒傳一篇言  
哀者六自斬衰以至緦麻輕重等差莫不有當也其  
曰哀之發於容體則因容體以為禮哀之發於聲音

則因聲音以為禮哀之發於言語則因言語以為禮  
哀之發於飲食則因飲食以為禮哀之發於居處則  
因居處以為禮哀之發於衣服則因衣服以為禮其  
始也本於哀其終也成於禮有是哀則不得行是  
禮有是禮則不得不致是哀也然而容體聲音言語  
動乎內者也飲食居處衣服在乎外者也內外俱備  
哀禮相稱五服之制可坐而定也

斬衰唯而不對齊衰對而不言大功言而不議小功總

麻議而不及樂此哀之發於言語者也斬衰三日不食  
齊衰二日不食大功三不食小功總麻再不食士與斂  
馬則壹不食故父母之喪既殯食粥朝一溢米莫一溢  
米齊衰之喪䟽食水飲不食菜果大功之喪不食醯醬  
小功總麻不飲醴酒此哀之發於飲食者也

鄭氏曰議謂陳說非時事也

孔氏曰唯而不對但唯於人不以言辭而對也雜記  
云三年之喪對而不問謂在喪稍久故對也大功稍



輕得言他事而不議論時事之是非雜記云齊衰之喪言而不語彼謂言已事為人說為語與此言異也齊衰二日不食謂正服齊衰也喪大記云三不食當是義服齊衰小功緦麻再不食喪大記云壹不食再不食則是壹不食謂緦麻再不食謂小功異人之說其義別也

嚴陵方氏曰唯則順之而已對則有可否焉對則應彼而已言則命物焉言則直言而已議則詳其義焉

議則主於事而已樂則通其情焉由其哀有輕重故發於言語有詳略也三不食則日有半也此言食與大記不能無小異溢與孟子言七十鎰之鎰同蓋二十兩也數登於十則滿矣而又益倍之為溢焉疏食者麤疏之食也

父母之喪既虞卒哭疏食水飲不食菜果暮而小祥食菜果又暮而大祥有醢醬中月而禫禫而飲醴酒始飲酒者先飲醴酒始食肉者先食乾肉

鄭氏曰先飲醴酒食乾肉者不忍發御厚味

孔氏曰此明父母終喪以來所食之節大祥食醴醬則小祥食菜果之時但用鹽酪也不能食者小祥食菜果之時得用醴醬故喪大記云小祥食菜果以醴醬醴酒味薄乾肉又澀所以先食之者以喪服除孝子不忍發初御醇厚之味也喪大記云祥而食肉者異人之說

父母之喪居倚廬寢苦枕塊不說經帶齊衰之喪居堊

室芊翦不納大功之喪寢有席小功總麻牀可也此哀之發於居處者也父母之喪既虞卒哭柱楣翦屏芊翦不納朞而小祥居垚室寢有席又朞而大祥居復寢中月而禫禫而牀斬衰三升齊衰四升五升六升大功七升八升九升小功十升十一升十二升總麻十五升去其半有事其縷無事其布曰總此哀之發於衣服者也鄭氏曰芊令之蒲革也此齊衰多二等大功小功多一等服主於受是極列衣服之差也

孔氏曰此明初遭五服之喪居處之異及遭父母喪至終服所居改變之節又明五服精麤之異芻翦不納芻為蒲葦為席翦頭為之不編納其頭而藏於內也亦有斬衰不居倚廬者則雜記云大夫居廬士居堊室是士服斬衰而居堊室也亦有齊衰之喪不居堊室者喪服小記云父不為衆子次於外註云自若居寢是也有事其縷無事其布曰縵者以三月之喪治其麻縷其細如絲故云縵麻以朝服十五升抽去

其半縷細而疏也有事其縷事謂鍛治布縷也無事其布謂織布既成不鍛治其布以哀在外故也案喪服記云齊衰四升此經云四升五升六升多於喪服篇二等也案喪服記大功八升若九升此云七升八升九升是多喪服一等也喪服記又云小功十升若十一升此云小功十升十一升十二升是多於喪服一等也鄭云服主於受者以喪服之經主於受服者而言以大功之殤無受服不列大功七升以喪服父

母為主欲其文相值故略而不言記者於是經極列衣服之差所以齊衰多二等大功小功多一等也

嚴陵方氏曰柱廬閒之楣以為之固故曰柱楣剪廬傍屏蔽之草而飾之故曰剪屏八十一縷曰升一服而升數不同者以有正服義服故也所謂喪多而服五者此也

山陰陸氏曰芊翦不納者翦之而已不納也言翦屏則前此茅茨不翦柱楣於柱置楣而已此暮而席居

聖室喪服傳既虞寢有席既練舍外寢傳所記尊者  
居喪之法此言大夫士禮而已知然者以傳上翦屏  
蓋屏不欲視外尊者之事也故曰前旒蔽明黻纁塞  
聰亦天子虞之日遠大夫士近若寢有席一施之於  
虞則疾徐相懸矣其言既虞卒哭柱楣翦屏亦以此  
然則諸侯五月而葬七月而卒哭其寢有席又在卒  
哭歟

賈氏曰吉服所以表德凶服所以表哀德有高下章



有升降衰有深淺布有精麤

儀禮疏

河南程氏曰古者八十一縷曰升斬衰三升則是二百四十三絲於今之布為已細總麻十五升則是千有二百絲今蓋無有矣

新安朱氏曰總十五升抽其半者是一篋只用一經如今廣中疎布又如單經黃草布皆只一經也然小功十五升則其縷反多於總矣又不知是如何

斬衰三升既虞卒哭受以成布六升冠七升為母疏衰

四升受以成布七升冠八升去麻服葛葛帶三重  
葛而小祥練冠繅緣要經不除男子除乎首婦人除乎帶男子何為除乎首也婦人何為除乎帶也男子重首婦人重帶除服者先重者易服者易輕者又暮而大祥素縞麻衣中月而禫禫而織無所不佩

鄭氏曰葛帶三重謂男子也五分去一而四糾之帶輕既變因為飾也婦人葛經不葛帶易服謂為後喪所變也婦人重帶帶在下體之上婦人重之辟男子

也其為帶猶五分經去一耳喪服小記曰除成喪者其祭也朝服縞冠此素縞者玉藻所云縞冠素紕既祥之冠麻衣十五升布深衣也謂之麻者純用布無采飾也大祥除衰杖黑經白緯曰織舊說織冠者采纓也無所不佩紛帨之屬如平常也織或作綬

孔氏曰此明父母之喪初死至練冠衰升數之變并明練後除脫之差也成布六升者以言三升四升五升之布其纓既麤疏未為成布也六升以下其纓漸

細與吉布相參故稱成布葛帶三重者既虞卒哭受服之節要中之帶以葛代麻帶又差小於前喪服傳云五服經帶相差皆五分去一以五分去一唯有四分見在三重謂作四股糾之積而相重四股則三重既變麻用葛因以為飾也未受服之前麻帶為兩股相合也此直云葛帶則首經雖葛不三重猶兩股糾之也小祥練冠緣緣者父沒為母與父同也至小祥又以卒哭後冠受其衰而用練易其冠也又練為中

衣以縗為領緣也大祥素縞麻衣者謂二十五日大祥祭此日除脫則首服素冠以縞紕之身著朝服而為大祥之祭祭後哀情未除更反服微凶之服首著縞冠以素紕之身著十五升麻深衣也知用十五升者案雜記云朝服十五升此大祥之祭既著朝服則大祥之後麻衣麤細當同朝服也中月而禫者中間也大祥之後更間一月而為禫祭二十七月而禫禫而纖者禫祭之時玄冠朝服禫祭既訖而首著纖冠

身著素端黃裳以至吉祭身著吉服尋常所服之物  
無不佩也鄭註云婦人葛經不葛帶者案少儀云婦  
人葛經而麻帶又上檀弓云婦人不葛帶故士虞禮  
曰婦人既練說首經不說帶此謂齊斬婦人帶不變  
若大功婦人變服亦受葛也云易服謂為後喪所變  
者以身先有前喪重令更遭後喪輕欲變易前喪也  
云其為帶猶五分經去一耳者以婦人斬衰不變帶  
以其重要故也婦人既重其要恐要帶與首經麤細

相似故云其帶猶須五分首經去一分耳以首尊於  
要但婦人避男子而重要帶爾引喪服小記證祥祭  
之服非素縞麻衣也引玉藻證此經素縞麻衣是大  
祥後所服也云謂之麻者純用布無采飾也者若有  
采飾則謂之深衣深衣篇所云是也緣以素則曰長  
衣是也緣以布則曰麻衣此麻衣是也黑經白緯曰  
織戴德變除禮也

賀氏曰斬衰既虞卒哭受以成布六升夫服緣情而

制故情降則服輕既虞哀必有殺是故以細代麤以齊代斬耳若猶斬之則非所謂殺也若謂以斬衰命章便謂受猶斬者則疏縗之受復可得猶用疏布乎是以斬衰之名本生於始死之服以名其喪耳不謂終其日月皆不變也

晉賀循  
見通典

唐禪變議曰祥禫之義案儀禮云中月而禫鄭玄以中月為閒月王肅以中月為月中致使喪朞不同制度非一歷代學黨議論紛紜宗鄭者則云祥之日鼓



素琴孔子彈琴笙歌乃省哀之樂非正樂也正樂者  
八音並奏使工為之者也禮記所云二十五月而畢  
者論喪之大事畢也謂除衰經與堊室爾餘喪未盡  
故服素縞麻衣著未吉之服宗王者案禮記云三年  
之喪再周二十五月而畢又檀弓云祥而縞是月禫  
徙月樂又魯人有朝祥而暮歌者夫子曰踰月則其  
善也又夫子既祥五日彈琴而不成聲十日而成笙  
歌又祥之日鼓素琴以此證無二十七月之禫也夫

人倫之道以孝為先上古喪期無數其仁人則終身  
滅性其衆庶有朝喪暮廢者中代聖人為作制節至  
重者斬縗以周斷後代君子以周若駟之過隙加以  
再周至於祥禫之節焚蕪之餘其文不備先儒所議  
互有短長夫喪以周斷加以再周豈非欲重其情而  
彰孝道者何乃惜一月之禫不加以膠柱於二  
十五月者哉據閒傳文勢足知除服後一月服大祥  
服後一月服禫服今約經傳求其適中可二十五月

終而大祥受以祥服素縞麻衣二十六月終而禫受以禫服二十七月終而吉吉而除徙月樂無所不佩夫如此求其情而合乎禮矣

通典

新安朱氏曰或問成布荅曰是稍細成布初來未成布也問縗緣荅曰縗今淺絳色小祥以縗為緣一入謂之縗禮有四入之說亦是漸漸加深色耳然古人亦不專把素色為凶蓋古人專用皮弁皮弁純白自今言之則為大凶矣問布升數荅曰八十縷為一升

古尺一幅只闊二尺二寸算來斬衰三升如今網一般又如漆布一般所以未為成布也如深衣十五升布似如今極細絹一般這處升數又曉未得古尺又短於今尺若盡一千二百縷須是一幅闊不止二尺二寸所謂布帛精麤不中數不弼於市又如何自要闊得這處亦不可曉 又曰二十五月祥後便禫看來當如王肅之說於是月禫徙月樂之說為順鄭氏之說未當 語錄

橫渠張氏曰古者紡績其布當有吉凶二種若三四升之麤及細總之細或去縷之半或不事其布或不事其縷不容吉凶二用者皆是特為有喪者設所謂成布蓋事縷事布供世俗常用成功之布但未加灰練爾其功尤麤略者為大功差細者為小功以蜃灰經練然後謂之練如此解之則練與成布義自兩安衰當單與練冠縗緣此特經文不足不當致疑於衰之有緣也除首者麻葛重雖大功之喪可易三年之

練冠舉大功之輕則齊衰可知練冠且去之故言除也若其經彼既自己除之矣此除服先重亦存舊註藍田呂氏曰始死易羔裘玄冠必以深衣素委貌徒跣扱衽不履不帶也然猶冠者蓋三日而後斂若將復生故未忍悉變也小斂則經當事不可無變也既斂矣不復生矣然後說髦而袒括髮說髦者不得視其親也袒者將不欲衣也括髮者不能冠也既奉尸夷于堂而拜賓所以奉死者之始也而生者之變亦

不可無始故始加麻麻服之重者也散要經之垂而復與冠屨未變而加絞帶皆變有漸也既殯之明日哀必有殺而不飾不可以久也故成服杖冠屨衣裳帶皆具而變之以惡所以為喪之飾也將啓則免而散帶垂見柩不可以無變也既虞卒哭受以成布變麻服葛衰日殺則服日輕不忍遽變故亦有漸也既練練衣練冠繩屨除首絰冠屨衣裳皆即輕也要經不除不忍盡變也緇緣黃裏漸有飾也練衣非衰也

以練布為衣明至親以朞斷加隆而三年故不以衰而以衣也祥夕為朞則除而縞冠明其祭漸吉不可以純凶也既祥縞冠麻衣既祥纖明變有漸也

嚴陵方氏曰受謂受服也六升而上然後謂之成布者以五升而下縷數漸少若未成然故也疏衰即齊衰也比功布之升為疏故亦謂之疏斬衰又疏矣然不謂疏衰者以斬之義為重而疏不足以名之故也山陰陸氏曰凡喪有變有除有受凡受以大受小以



多受寡故三升以六升受之四升以七升受之去麻服葛謂以麻易葛所謂變也練後縗緣祥先素縗大祥彌吉故也經在上體之上帶在下體之上男子重首婦人重要蓋取諸此作記者雖非一人大抵前後亦相足也若練衣縗緣言其衣矣今言練冠縗緣則著冠亦縗緣也若縗冠素紕言其冠矣今言又朞而大祥素縗麻衣則著衣亦素紕也變素紕言素縗則其紕也以縗之素者也若所謂縗白是歟先儒謂染

衣純之以素則曰長衣純之以布則曰麻衣非是

易服者何為易輕者也斬衰之喪既虞卒哭遭齊衰之喪輕者包重者特既練遭大功之喪麻葛重

鄭氏曰此因上說而問之也既虞卒哭謂齊衰可易斬服之節也輕者可施於卑服齊衰之麻以包斬衰之葛謂男子帶婦人經也重者宜主於尊謂男子之經婦人之帶特其葛不變之也此言包特者明於卑可以兩施而尊者不可貳此說所以易輕者之義既

練以下言大功可易斬服之節也斬衰已練男子除經而帶獨存婦人除帶而經獨存謂之單單獨也遭大功之喪男子有麻經婦人有麻帶又皆易其輕者以麻謂之重麻既虞卒哭男子帶其故葛帶經替之葛經婦人經其故葛經帶替之葛帶謂之重葛

孔氏曰此經更釋易輕之意斬衰之喪既虞卒哭者謂士及庶人也故卒哭與虞並言之若大夫以上則虞受服故喪服註云天子諸侯卿大夫既虞士卒哭

而受服輕者包言斬衰受服之時而遭齊衰初喪男  
子輕要得著齊衰要帶而兼包斬衰之帶也若婦人  
輕首得著齊衰首經而包斬衰之經也重者特者男  
子重首特留斬衰之經婦人重要特留斬衰要帶也  
斬衰齊衰既是重服云包云特則知齊衰大功亦包  
特也鄭註云卑者可以兩施卑謂男子卑要婦人卑  
首兩施謂施於齊衰又得兼斬衰以其輕卑之也云  
尊者不可貳者尊謂男子尊首婦人尊要故事尊正

得尊於重服不可差貳兼服輕也云男子有麻經婦  
人有麻帶又皆易其輕者以麻謂既練遭大功之喪  
男子首空著大功麻經婦人要空著大功麻帶男子  
又以大功麻帶易練之葛帶婦人又以大功麻經易  
練之葛經是重麻也大功既虞卒哭之後大功葛帶  
輕於練之葛帶故男子反帶其練之故葛帶也大功  
既葬男子則經大功之葛經婦人則帶大功葛帶鄭  
註謂之朞葛經朞葛帶者麤細與朞同其實是大功

葛經帶也

藍田呂氏曰此篇所記變節竊求其意以為前後喪輕重之變適同故立此文以表之斬既虞與齊初喪既同矣斬從練齊既虞與大功初喪亦幾同矣故輕包重特止為斬既虞遭齊衰之喪而立麻葛重止為斬既練遭大功之喪而立麻葛兼服則為齊既虞遭大功之喪大功既虞遭小功之喪小功既虞遭總之喪而立麻葛重者其始也以麻葛變

雜記有三年之練冠則以大功

之麻易之惟杖屨不易

麻葛兼服者其輕者變而兼服之

閒傳麻同

則兼服之服問總之麻不變小功之麻小功之麻不變大功之葛

嚴陵方氏曰輕者謂男子之要帶婦人之首經重者謂男子之首經婦人之要帶以其輕則兩施之故曰包以其重則獨留焉故曰特

齊衰之喪既虞卒哭遭大功之喪麻葛兼服之

鄭氏曰此言大功可易齊衰朞服之節也兼猶兩也不言包特而兩言者包特著其義兼者明有經有帶

爾

孔氏曰此明以後服易前服之意也兼服即前之義  
今齊衰既虞卒哭遭大功之喪易換輕者男子則大  
功麻帶易齊衰之葛帶其首猶服齊衰葛經是首有  
葛要有麻故云麻葛兼服之據男子也婦人則首服  
大功之麻經要服齊衰之麻帶上下俱麻不得云兼  
服也鄭註包特著其義以卑者可包尊須特著其尊  
卑之義故於斬衰重服言之此言兼者不取其義也



所以不稱麻葛重者以三年之喪既練之後男子除首經婦人除要帶於先既單令首經皆有故須稱重今朞以下男子首之與要固當皆有經帶婦人亦然既不似既練之單所以不得稱重

斬衰之葛與齊衰之麻同齊衰之葛與大功之麻同大功之葛與小功之麻同小功之葛與緦之麻同麻同則兼服之兼服之服重者則易輕者也

鄭氏曰此竟言有上服既虞卒哭遭下服之差也唯

大功有變三年既練之服小功以下則於上皆無易  
焉此言大功之葛與小功之麻同小功之葛與總之  
麻同主為大功之殤長中言之服重者謂特之也則  
者則男子與婦人也凡下服虞卒哭男子反其故葛  
帶婦人反其故葛經其上服除則固自受以下服之  
受矣

孔氏曰此明五服葛之與麻麤細相同同則得服後  
麻兼前服葛也案服問小功總不得變大功以上此

小功之麻得變大功之葛總之麻得變小功之葛者  
謂成人之殤在長中也兼服之服重者則前文重者  
特是也則易輕者謂男子婦人則換輕者前文輕者  
包是也以前文麻葛兼服但施於男子今此男子易  
於要婦人易於首俱得易輕故鄭云則者則男子與  
婦人也凡後初喪雖易前服之輕後服既葬還須反  
服前喪之服故鄭云反其故葛帶葛經也

橫渠張氏曰兼服之服重者則易輕者舊註不可用

此為三年之喪以上而言故作記者以斬衰及大功

明之若斬衰既練齊衰既卒哭則首帶皆葛又有大

功新喪之麻則與齊衰之首經麻葛兩施之

兼服之名得諸

此蓋既不敢易斬衰之輕

以斬葛大於大功之麻也

又不敢易齊

首之重

輕者方敢易去則重者固當存


故麻葛之經兩施於首若大

功既葬則服齊首之葛不服大功之葛所謂兼服之

服重者則變輕者正謂此爾若齊麻未葛則大功之

麻亦止於當免則經之而已如此則喪變雖多一用

此制而前後禮文不相乖戾



禮記集說卷一百四十四

欽定四庫全書

經部

禮記集說卷一百四十五

詳校官監察御史<sub>臣</sub>龔驤文

給事中<sub>臣</sub>溫常綬覆勘

總校官庶吉士<sub>臣</sub>何思鈞

校對官典簿<sub>臣</sub>劉景岳

謄錄監生<sub>臣</sub>鄧捷成

欽定四庫全書

禮記集說卷第一百四十五 宋 衛湜 撰

三年問第三十八

孔氏曰案鄭目錄云名曰三年問者善其問以知喪服年月所由此於別錄屬喪服

嚴陵方氏曰三年之喪百王之所同問喪者以是為首故記喪者以是名篇

三年之喪何也曰稱情而立文因以飾羣別親疏貴賤

之節而弗可損益也故曰無易之道也創鉅者其日久  
痛甚者其愈遲三年者稱情而立文所以為至痛極也  
斬衰苴杖居倚廬食粥寢苫枕塊所以為至痛飾也三  
年之喪二十五月而畢哀痛未盡思慕未忘然而服以  
是斷之者豈不送死有已復生有節也哉

鄭氏曰稱情而立文稱人之情輕重而制其禮也羣  
謂親之黨也無易猶不易也復生除喪反生者之事  
也



孔氏曰此一節問喪三年所由解釋所以三年之意此記者假設其問立文謂立禮之節文也飾謂章表也羣謂五服之親因三年之喪差降各表其親黨也親謂大功以上疏謂小功以下貴謂天子諸侯絕期卿大夫降期以下賤謂士庶人服族其節分明不可損益故曰無易之道引舊語成文也創鉅者鉅大也大則難愈痛甚者喪親傷腎乾肝斬斫之痛既甚故差亦遲立三年之文以表是至痛極者也人子於此

二十五月之時悲哀推痛猶未能盡憂思悲慕猶未能忘而外貌喪服以是斷割若不以是裁斷則送死之情何時得已復吉之禮何有限節

嚴陵方氏曰其生也父母有三年之愛於其子及其沒也故子有三年之喪以報之愛所謂情也三年之喪所謂文也故曰稱情而立文禮以情為本而以文為飾故曰因以飾羣羣則莊子所謂人羣是也服君與父皆斬衰三年由父而降則殺焉所以別親疏之

節也由君而降亦殺焉所以別貴賤之節也親與貴者不可易而損之䟽而賤者不可易而益之故曰弗可損益無易之道也送死者之禮有已復生者之事有節則不以死傷生故也

新安朱氏曰有問喪祭之禮至周公然後備夏商而上想甚簡略荅曰然親親長長貴貴尊賢夏商而上大槩只是親親長長之意到周又添得許多貴貴底禮數如始封之君不臣諸父昆弟封君之子不臣諸

父而臣昆弟期之喪天子諸侯絕大夫降然諸侯大夫尊同則亦不絕不降此皆貴貴之義上世想皆簡略未有許多降殺貴貴底禮數凡此皆天下之大經前世所未備到得周公搜剔出來立為定制更不可易

凡生天地之間者有血氣之屬必有知有知之屬莫不知愛其類今是大鳥獸則失喪其羣匹越月踰時焉則必反巡過其故鄉翔回焉鳴號焉踣躅焉跼蹐焉然後

乃能去之小者至於燕雀猶有啁噍之頃焉然後乃能去之故有血氣之屬者莫知於人故人於其親也至死不窮

鄭氏曰匹偶也言燕雀之恩不如大鳥獸大鳥獸不如人含血氣之類人最有知而恩深也於其五服之親念之至死無止也

孔氏曰此經明天地之間血氣之類皆有所知至於鳥獸大小各能思其種類況在於人何有窮已

將由夫患邪淫之人與則彼朝死而夕忘之然而從之則是曾鳥獸之不若也夫焉能相與羣居而不亂乎將由夫修飾之君子與則三年之喪二十五月而畢若馬之過隙然而遂之則是無窮也故先王焉為之立中制節壹使足以成文理則釋之矣

鄭氏曰邪淫之人謂惡人薄於恩死則忘之其相與聚處必失禮也遂之謂不時除也立中制節謂服之年月也釋猶除也去也

孔氏曰此明君子小人不同先王為之立中人之制節駟謂駟馬隙空隙駟馬駿疾空隙狹小以駿疾而過狹小言急速之甚立中制節立中人之制以為年月限節也三年一閏天道小成子生三年免於父母之懷故服以三年成文章義理則除去其服釋猶除去也

橫渠張氏曰三年之喪二十五月而畢此言除之內於二十五月之晦為祥祭又兩月之禫共是二十七

月二十七月之晦為禪祭據禮鑽燧改火天道一變期可已矣情不可已於是再期再期又不可已於是加之三月是二十七月也況書有明證春秋書祭祀可以考其得禮不得禮

山陰陸氏曰言修飾者猶如此況所謂天資忠孝者歟先王為之立中制節一使足以成文理詩所謂庶見素韜兮聊與子如一兮是矣傳以為三年之喪賢者之所輕不肖者之所勉人道之至文者也情極則文



至

然則何以至期也曰至親以期斷是何也曰天地則已易矣四時則已變矣其在天地之中者莫不更始焉以是象之也

鄭氏曰言三年之義如此則何以有降至於期也期者謂為人後者父在為母也至親以期斷言服之正雖至親皆期而除也又問服斷於期之義言法天地變易可以期也

孔氏曰上節既稱為父母三年此一節釋為期之義莫不更始言天地之中動植之物無不於前事之終更為今事之始以是象之言以人事法象天地故明年也今檢尋經意父母本意三年何以至期者但問其一期應除之義故荅曰至親以期斷是明一期可除之節故禮期而練男子除經婦人除帶下文云加隆故至三年是經意不據為人後及父在為母期鄭之此釋恐未盡經意

然則何以三年也曰加隆焉爾也焉使倍之故再期也由九月以下何也曰焉使弗及也故三年以為隆總小功以為殺期九月以為間上取象於天下取法於地中取則於人人之所以羣居和壹之理盡矣

鄭氏曰法此變易可以期何以乃三年為也言於父母加隆其恩使倍期也焉猶然也焉使弗及言使其恩不若父母也取象於天地謂法其變易自三年以至總皆歲時之數言既象天地又足以盡人聚居純

厚之恩也

孔氏曰焉使弗及焉亦然也然使恩隆不及於期也五月不及九月三月不及五月轉相不及也隆謂恩愛隆重殺謂情理殺薄間是隆殺之間天地之氣三年一閏是三年取象於一閏天地一期物終是一期取象於一周九月象陽數又象三時而物成也五月象五行三月象天地一時而氣變此五服之節皆取法天地也子生三年免於父母之懷故服三年人之一

歲情意變改故一期九月五月三月亦逐人情而減殺是取則於人既法天地與人三才並備故能調和羣衆聚居和諧專一義理盡備矣

嚴陵方氏曰言服之正雖至親皆以期而除至於倍之而再期者特加隆於父母而已天以有所垂故曰取象經言天垂象是矣地以有所效故曰取法易言效法之謂坤是矣人以有所作故曰取則書言明哲實作則是矣然而喪或以三月或以五月或以九月

或以期年或以三年喪凶禮也乃以陽數之奇何哉  
蓋陰所以致死陽所以致生死而致生之者孝子不  
忍死其親之意也

山陰陸氏曰焉是也知然者以春秋傳曰晉鄭焉依  
國語作是知之也

故三年之喪人道之至文者也夫是之謂至隆是百王  
之所同古今之所壹也未有知其所由來者也孔子曰  
子生三年然後免於父母之懷夫三年之喪天下之達

喪也

鄭氏曰言三年之喪喪禮之最盛也不知其所從來  
喻此三年之喪前世行之久矣達謂自天子至於庶  
人

孔氏曰此一節重明三年之義言於人道之中至極  
文理之盛人恩之至極隆厚也孔子曰引論語之文  
案易繫辭云古之葬者厚衣之以薪葬之中野不封  
不樹喪期無數尚書云百姓如喪考妣三載此云不

知所由來者但不知定在何時唐虞以前喪服與吉服同皆以白布為之故郊特牲云齊則緇之若不齊則皆用白布至三代吉凶異也

馬氏曰中庸曰三年之喪達乎天子父母之喪無貴賤一也然而世衰道微狃於習俗故雖宰我親受業於孔門猶曰三年不為禮禮必壞三年不為樂樂必崩鑽燧改火期可已矣雖聖人之善誘亦無如之何姑曰於汝安乎汝安則為之蓋人情之大不美也如此亦



豈可以強率以從先王之制哉嗚呼常人之所行而  
宰我乃獨以為異固孔子所不取禮之所載三年問  
者豈亦當時之人疑此為重歟故曰凡天地之間有  
血氣之屬大至於鳥獸小至於燕雀莫不知愛其類  
又況於人乎其曰三年之喪人道之至文百王之所  
同古今之所一則為此書者亦有為而作也

深衣第三十九

孔氏曰案鄭目錄云名曰深衣者以其記深衣之制

也深衣連衣裳而純之以采者素純曰長衣有表則謂之中衣大夫以上祭服之中衣用素詩云素衣朱襮玉藻曰以帛裏布非禮也士祭以朝服中衣以布明矣此於別錄屬制度其長衣中衣及深衣其制度同玉藻曰長中繼揜尺若深衣則緣而已故玉藻云朝玄端夕深衣庶人吉服亦深衣皆著之在表也其中衣在朝服祭服喪服之下知喪服亦有中衣者檀弓曰練衣黃裏注云練中衣以黃為內是也但喪服

中衣不得繼拵尺也故喪服儀云帶緣各視其冠注  
云緣如深衣之緣是喪服中衣用深衣則深衣緣之  
以采故下云具父母大父母衣純以績以青之屬也  
唯孤子深衣純以素但以緣而已不與長衣同其吉  
服中衣亦以采緣其諸侯得綃黼為領丹朱為緣郊  
特牲云綃黼丹朱中衣大夫之僭禮則知大夫士不  
用綃黼丹朱但用采純而已矣無文以明之其長衣  
以素緣知者若以采緣則與吉服中衣同故知以素

緣也若以布緣則曰麻衣知用布緣者以其稱麻衣  
故知也其喪服之中衣其純用布視冠布之麤細至  
葬可以用素緣也練則用縗也其詩之麻衣則與此  
別彼謂吉服之衣也所以此稱深衣者以餘服則上  
衣下裳不相連此深衣衣裳相連被體深邃故謂之  
深衣

藍田呂氏曰此篇純記深衣之制度而已古者衣裳  
殊制所以別上下也唯深衣之制衣連裳而不殊蓋

私燕之服爾如冠之法冠武殊制至於居冠則屬武而不殊皆所以尚簡便也雖曰簡便不可以無法故有五法之象

長樂陳氏曰先王嚴分守一道德常見於形名度數之間而分守已嚴道德已一常寓於服飾器械之際蓋衣服者近人而易曉者也故作服而無其法則不足以為法服故深衣或圜或直一以天制或方或曲一以地制而崇之為三才卑之為三極莫不并與其

精微之意以示之此深衣之所由作也所謂深衣不特以被體之深邃有以異乎常是故謂之深而自其理而觀之則深之又深極其精焉豈衆人之所能測歟

嚴陵方氏曰經曰有虞氏深衣而養老傳曰庶人服短褐深衣則自天子至於庶人皆服之也以其義之深名之

馬氏曰詩曰麻衣如雪閭傳曰大祥素練麻衣喪服

記曰公子為其母麻衣繚緣而先儒皆以深衣言之  
蓋諸侯夕深衣則詩所謂麻衣者夕服也公子為其  
母小功則記所謂麻衣者小功服也小功緣以繚則  
大祥緣以布則夕服緣以采矣何則孤子以素則凡  
孤子者緣以布可也蓋深衣之為物可以為文可以  
為武可以擯相可以治軍旅在虞以為燕服故王制  
曰有虞氏深衣而養老是也在周以為夕服故玉藻  
曰朝玄端夕深衣是也又以為喪服而庶人以為吉

服深衣之用豈施於一哉

山陰陸氏曰冠言邃衣言深亦言之法

古者深衣蓋有制度以應規矩繩權衡短毋見膚長毋被土續衽鉤邊要縫半下

鄭氏曰聖人制事必有法度衣取蔽形毋被土為汙辱也續猶屬也衽在裳旁者也屬連之不殊裳之前後也鉤讀如鳥喙必鉤之鉤要縫半下三分要中減一以益下下宜寬也



孔氏曰作記之時深衣無復制度故稱古者規矩繩  
權衡則制度所應者備在下文深衣之裳十二幅皆  
寬頭在下狹頭在上皆似小要之衽是前後左右皆  
有衽也續衽謂所續之衽鉤其旁邊當身之一旁非  
謂餘衽悉當旁也喪服裳前三幅後四幅各自為之  
不相連今深衣裳一旁則連之相著一旁則有續衽  
掩之與相連無異故鄭云屬連之不殊裳前後也深  
衣之衽已於玉藻釋之要縫謂要中之縫尺寸濶狹

半下畔之濶下畔一丈四尺四寸則要縫半之七尺  
二寸鄭注據裳之一幅凡布廣二尺二寸四寸為縫  
一尺八寸在三分之一分為六寸減此六寸以益於  
下是下二幅有二尺四寸上二幅有一尺二寸故云  
三分要中減一以益下下容舉足而行故宜寬也

慈湖楊氏曰短母見膚長母被土此言其縱也續衽  
鉤邊此言其衡也自旁而數之衽居其端也古之衽  
今之襟亦曰袂也深衣屬裳則當續衣之衽使之長

與裳齊也上狹下廣其邊如鉤言其旁曲也於體為  
宜玉藻曰衽當旁此之謂也衽亦修廣矣矧當衣前  
故首言之喪服言衰衣裳負適袂祛廣博尺寸靡不  
備載獨不見所謂襟焉而有衽二尺有五寸是衽即  
襟也喪服言衣二尺有二寸襟與衣齊而衽二尺有  
五寸何也衰衣帶下尺則衣之長可知袂幅屬衣之  
處曰二尺二寸非謂衣之長止於此衣帶下尺并帶  
博處共長三尺三寸內闕中八寸偏前以安項衽綴

於前領平衡之下則衽長二尺五寸正其度也通乎  
喪服之衽則深衣之衽與衣齊是為襟昭昭矣郭璞  
注方言亦謂衽為襟鄭康成既誤釋之孔穎達復誤  
疏之謂深衣十二幅幅即衽也且援魯莊公以衽受  
齊餽為證而深衣之篇未嘗以幅為衽又與玉藻衽  
當旁之文不符蓋孔思不及此故不知此下廣之衽  
正足以受餽不為不寬也古志四夷左衽喪記斂衣  
左衽咸謂襟也左傳結衽若訟者結此衽也古棺有

衽是謂小要以鈎邊如衽也古曰衽席席左歛右歛如衽也詳考衽制無所不通

涑水司馬氏曰案漢書江充衣紗縠禪衣曲裾後垂交輸如淳曰交輸割正幅使一頭狹若燕尾垂之兩旁見於後是禮深衣續衽鈎邊賈逵謂之圭蘇林曰交輸如今新婦袍之袪全幅緇角割名曰交輸裁也釋名曰婦人上服曰袪其下垂者上廣下狹如刀圭也然則別有鈎邊不在裳十二幅之數亦斜割使一

端濶一端狹以濶者在上狹者在下交映垂之如燕尾有鉤曲裁其旁邊綴於裳之右旁以掩不相連之處

嚴陵方氏曰深衣之作其所由來尚矣故以古者冠篇首袂在前以應規袷在中以應矩縫在後以應繩齊在下以應權衡短毋見膚則其形不褻雖約而不失於儉長毋被土則其物不費雖隆而不過於奢衽襟也與裳相續故謂之續衽裾裳之邊曲以鉤束焉

故曰鈎邊玉藻所謂衽當旁是也要縫之博居下齊之半玉藻所謂縫齊倍要是也以縫齊為倍則要縫為半矣此所以互言之

藍田呂氏曰所謂毋見膚毋被土鈎邊半下可以運肘反詘之及肘毋厭脅者言深衣長短寬急之制也應十有二月應規應方應直應平者言深衣之法象也可以為文可以為武可以擯相可以治軍旅者言深衣之用也純以績以青以素言深衣用純之別也

母見膚不欲褻也母被土不欲汙也此衣之長短之中也續衽鉤邊此衣之寬急之中也衽者衣裳之旁幅也玉藻所謂衽當旁是也衣之旁幅下殺裳之旁幅上殺上下之衽相續而中曲以是小要取名焉故曰鉤邊

山陰陸氏曰此言縫非言圍言要非言幅也謂若深衣入要半寸其縫齊摺一寸是之謂半下鄭氏謂三分減一益下此續縫為圍要為幅之誤也亦於半下



之言礙矣且幅縮縫要與齊皆衡縫深衣應規矩繩權衡若象服雖議於規矩準繩權衡之外可也

袼之高下可以運肘袂之長短反詘之及肘帶下毋厭髀上毋厭脅當無骨者

鄭氏曰袼衣袂當掖之縫也肘不能不出入袂屬幅於衣詘而至肘當臂中為節臂骨上下各尺二寸則袂肘以前尺二寸肘或為腕帶當骨緩急難為中也孔氏曰袼謂當臂之處袂中高下宜稍寬大可以運

動其肘袂二尺二寸肘尺二寸是容運肘也袂之長短反詘之及肘者袂長二尺二寸并緣寸半為二尺三寸半除去其縫之所殺各一寸餘有二尺一寸半在從肩至手二尺四寸今二尺一寸半之袂得反詘及肘者以袂屬於衣幅廣二尺二寸身脊至肩但尺一寸也從肩覆臂又尺一寸是衣幅之畔覆臂將盡今又屬袂於衣又二尺一寸半故反詘其袂得及於肘也帶若當骨則緩急難中故當無骨之處比深衣

帶下於朝祭服之帶也朝祭之帶則近上故玉藻云三分帶下紳居二焉是自帶而下四尺五寸也

涑水司馬氏曰案袂即今之所謂袖也鄭云屬幅於衣謂裨於身旁未必皆盡一幅尺二寸也云臂上下各尺二寸者亦據中人為率爾如孔所言拘泥太甚況從肩至袂口二尺二寸半則反詘之過肘矣經以臂之短長布幅濶狹皆無常準故但云屈之及肘謂袖之短長適與手齊則反詘及肩自然及肘矣

藍田呂氏曰格之高下可以運肘袂之長短反詘之及肘比袂之寬急之中也格當腋之縫也不二尺二寸則不能回肘矣袂屬幅於衣詘而至肘則上下各尺二寸矣帶下毋厭髀上毋厭脅當無骨者此衣帶高下之中也

嚴陵方氏曰袂長短詘之及肘玉藻所謂祛尺二寸是矣袼也祛也袂也皆衣之名也在脇者則謂之袼在肱者則謂之祛在末者則謂之袂帶下毋厭髀上

母厭脅若是則正當腹間矣深衣燕服也故欲緩急之適如此

馬氏曰服身之章身服之準故視肘以為袂肘尺二寸袂二尺二寸殺袂以為袪袪尺二寸三袪以為要袂尺二寸倍為二尺四寸三之七尺二寸倍要以縫齊丈四尺四寸也

制十有二幅以應十有二月袂圓以應規曲袷如矩以應方負繩及踝以應直下齊如權衡以應平

鄭氏曰裳六幅幅分之以為上下之殺袂圓應規謂胡下也袷交領也古者方領今小兒衣領繩謂繫與後幅相當之縫也踝跟也下齊齊緝也

孔氏曰每幅交解為二是十二幅也鄭以漢時領皆嚮下交垂故云古者方領似今擁咽故云若今小兒衣領方折之也負繩謂衣之背縫及裳之背縫上下相當如繩之直非謂實負繩也

涑水司馬氏曰此謂三分其幅狹處占狹處濶處占濶

處占二交解斜裁顛倒縫之使狹處皆在上濶處皆在下假使布幅二尺二寸除裁縫外有一尺八寸則狹處六寸濶處一尺二寸是也其人肥大則幅隨而闊瘦細則幅隨而狹要須十二幅下倍於上不必拘以尺寸之數牛領下垂者謂之胡胡下謂從袖口至腋下裁令其勢圓如牛胡也方領如孔所言似三代以前人反如今時服上領衣但方裁之耳案上領衣之制其上須用結紐乃可服不知古人果如此不

也鄭注周禮袷狀如著橫銜之繡潔於項顏師古注漢書繡者結礙也潔繞也蓋為結紐而繞項也然則古亦有結紐也繡音獲潔音結漢時小兒衣服既不可見而後漢馬援傳朱勃衣方領能矩步注引前書音義曰頸下施衿領正方學者之服也如此似於頸下別施一衿映所交領使之方正今朝服有方心曲領以白羅為之方二寸許綴於園領之上以繫於頸後結之或者袷之遺像歟又今小兒疊方幅繫於頸



下謂之涎衣亦與鄭說頗相符然事當闕疑未敢決從也後漢儒林傳曰服方領習矩步者委蛇乎其中注方領直領也春秋傳叔向曰衣有襜杜曰襜領會也工外反曲禮曰視不上於袷鄭曰袷交領也然則領之交會處自方即謂袷疑更無他物今且從之以就簡易故以如此論之案衣之背縫謂之袷袷音督慈湖楊氏曰曲袷如矩以應方袷交領也夫袷衣上古之制也領正方其前平衡故可綴六寸之袷後儒

不究古者製衣之始自然之體若是而曰如今中衣邪領之交亦近於方也使古表衣之領邪則六寸之袞於何所綴之也邪綴於前領則非正也古初製衣惟取闕中之方以安項爾簡嘗為方領深衣久則前墜近於今之圓領則後世變而為圓領亦其勢之自然又變而為邪領者其當暑之為歟以是為中衣不敢以為表衣人心之靈不敢尚巧而下朴也深衣惟曰抱方時已圓其所負之方歟中古之制歟抑闕

中偏前故為抱方歟後方循頸而勢圓故獨言抱方歟

石林葉氏曰謂袷為方領不知何據以吾考之袷圓以應規不云領曲以應矩而云曲袷如矩以應方則袷與領非一物也張華注朱勃事引漢書音義頸下施衿正方儒者之服則領之外蓋別有袷方折之加於領上此正古深衣之制也故云負繩抱方繩謂背縫之直則抱之宜在胸前若為交領則當在背何抱之

云乎曲禮視不上於袷鄭氏亦以袷為交領袷當在帶之上所以尊天子若為交領無乃大高乎尤可見其非也

藍田呂氏曰衣袂之制有三有侈者自服而侈之袷至袷而侈之朝服以上是也有端者自袷至袷方正而製之玄端素端是也有園者內殺於袷外殺於袷中則胡下深衣是也欲使行者舉手以為容儀如規之園也

長樂陳氏曰十二月者天數也袂圓以應規而圜者天之體曲袷如矩以應方而方者地之象也負繩及踝以應直下齊如權衡以應平而直與平者人之道何以知其然耶玉藻曰戴冕璪十有二旒則天數也蓋天之大數不過十二故月之至於十二而後成歲功猶之深衣也必十二幅而後可以為衣之良也唯夫衣之數有以合乎天之數此所以為十二月之應也著不息者天也而袂者動而不息也著不動者地

也而矜者靜而不動也孟子曰規矩方圓之至也而  
文中子曰圜者動方者靜其見天地之心乎此其意  
也至於平則不傾也直則不屈也書曰平康正直論  
語曰人之生也直此又足以見負繩下齊之義也禮  
嚴陵方氏曰袂在前以動而致用故欲圜圜者動故  
也袷在中以靜而成體故方方者靜故也及踝謂至  
足之跟也下齊謂在下之緝也

山陰陸氏曰日月有常焉應是而已深衣之裳也深

衣衣不殊上下裳不殊前後故也知然者以言十有二幅以應十有二月有言負繩及踝以應直知之也故規者行舉手以為容負繩抱方者以直其政方其義也故易曰坤六二之動直以方也下齊如權衡者以安志而平心也

鄭氏曰行舉手謂揖讓也引易言深衣之直方應易之文也政或為正心平志安行乃正或低或仰則心有異志者歟

孔氏曰所以袂園中規者欲使行者舉手揖讓以為容儀如規也負繩背之縫也抱方領之方也以直其正解負繩以方其義解抱方記者既明方直之義故引坤卦之六二直方以證之裳下之齊如權之衡低仰平也

長樂陳氏曰於規言手則袷為頸下齊為足踝為膝可知也於直方言坤之六二則安志平心者為泰之無平不陂而舉手以為容者亦乃乾之反復其道可



知也蓋先王之法類多如此要在考之也然豈特此也義所以行己也政所以正人也行己以義貴於方故於義言方而正人以政則貴於直故於政言直易曰義以方外傳曰枉己者未有能直人者是也若夫志譬則權也心譬則衡也衡之低昂皆權之輕重則心之平傾由志之安危此所謂安其志而平其心焉嚴陵方氏曰規矩者方圓之體方圓者規矩之用自曲恰如矩以應方而下皆上言體下言用唯袂圜以

應規則上言用下言體何哉蓋袂之園也非其體然  
及舉手以為容則園爾乃其用然也上言如矩而後言  
負繩者以衣之先後為之序也下言負繩而後言抱  
方者以易之直方為之序也且制十有二幅以應十  
有二月者仰觀於天也直其政方其義者俯察於地  
也袷之高下可以運肘者近取諸身也以規矩繩權  
衡者遠取諸物也若是則制度固已深矣謂之深衣  
豈為過

山陰陸氏曰規乾之事也若所謂動容周旋中禮至矣下以亦善言規據以直其政以安志而平心言以上負繩內也抱方外也凡向以後為內敬以直內義以方外案邾子執玉高其容仰魯公執玉卑其容俯君子於此觀禍福則如權衡豈可少哉

五法已施故聖人服之故規矩取其無私繩取其直權衡取其平故先王貴之故可以為文可以為武可以擯相可以治軍旅完且勿費善衣之次也

鄭氏曰五法已施聖人服之言非法不服也完且弗費言可苦衣而易有也深衣者用十五升布鍛濯灰治純之以采善衣朝祭之服也自士以上深衣為之次庶人吉服深衣而已

孔氏曰以其完牢可苦事衣著以白布為之不須黼黻錦繡是易有也雜記云朝服十五升此深衣與朝服相類故用十五升布鍛濯灰治謂打洗鍛濯用灰治理使和熟也然則喪服麻衣雖似深衣之制不必

鍛濯灰治以其雜凶故也案玉藻諸侯夕深衣祭牢  
肉又大夫士朝玄端夕深衣是深衣為朝祭之次服  
也諸侯之下自深衣以後更無餘服故知是庶人之  
吉服喪服有衰裳包貴賤上下無差亦明庶人吉服  
乃深衣也

藍田呂氏曰深衣之用上下不嫌同名吉凶不嫌同  
制男女不嫌同服諸侯朝朝服夕深衣大夫士朝玄  
端夕深衣庶人衣吉服深衣而已此上下之同也有

虞氏深衣而養老諸侯大夫夕皆深衣將軍文子除喪而受越人弔練冠深衣親迎女在塗壻之父母死深衣縞總以趨喪此吉凶男女之同也蓋深衣者簡便之服雖不經見推其義類則非朝祭皆可服之故曰可以為文可以為武可以擯相可以治軍旅也

長樂陳氏曰文事則有冕弁服武事則有韋弁服而深衣次之先儒以善衣為朝祭之服蓋舉一端明之也然則深衣所以異於餘服者不特衣裳連餘服幅

前三後四深衣則十二幅矣餘服之帶三分帶下紳居二焉深衣之帶則當無骨者矣

嚴陵方氏曰五法則規矩繩權衡也五法之所取無非至公然必以規矩言無私者以規矩之方圓有天地之象焉其無私為足道故也聖人以德言先王以位言有德足以稱之故服之有位足以作之故貴之端冕則有敬色所以為文介冑則有不可辱之色所以為武然而端冕可以為文而已且不可以為武介

冑可以為武而已且不可以為文兼之者唯深衣而已然可以為文非若端冕可以視朝臨祭也特可以贊禮而為擯相而已可以為武非若介冑可以臨難折衝也特可以運籌而治軍旅而已制有五法故曰完其質則布其色則白故弗費吉服以朝祭為上燕衣則居其次故曰善衣之次善衣吉服也

馬氏曰五物者以其極至而可以為法於天下也故聖人之作深衣必應規矩繩權衡者以謂被於一身



之間而可以為萬事之則故視其服者知其道觀其  
容者知其德輕重曲直方圓必來取法而不可欺矣  
此篇之制度所以為詳也制十有二幅以應時袂圓  
以天袷方繩直以應地應天以合自然應地以明不  
息應時則設施先後莫不有序及其歸也要在安志  
平心而已

具父母大父母衣純以纁具父母衣純以青如孤子衣  
純以素純袂緣純邊廣各寸半

鄭氏曰尊者存以多飾為孝續畫文也三十以下無父稱孤純謂緣之也緣袂謂其口也緣紒也緣邊衣裳之側廣各寸半則表裏共三寸矣唯袷廣二寸

陸氏曰大父母祖父母也

唐陸  
朗

孔氏曰具父母父母俱在也大父母則亦然也若其不具一存一亡不必純以續也唯有父母而無祖父母故飾少而純以青若無父母唯祖父母在亦當然也純其袂緣則袂口也非是口外更有緣也緣字讀

如緇謂深衣下緣也故既夕禮云明衣縗緇緇鄭注  
云在幅曰緇在下曰緇

藍田呂氏曰為人子者常言不稱老大孝終身慕父  
母故髧彼兩髦盡孺子之飾以致孺子之慕焉具父  
母大父母安可不盡孺子之飾故純以續髧髧之義  
也大父母不存雖具父母純以青者有所殺也父母  
存衣冠不純素至於孤子則純素可也三十以下無  
父可以稱孤故曰幼而無父曰孤若三十以上有為

人父之道不言孤也

長樂陳氏曰具父母大父母純以續備五采以為樂也具父母純以青體少陽以致敬也孤子純以素存凶飾以致哀也小功純以縗則大祥緣以布吉時夕服緣以采

嚴陵方氏曰續會五采青則飾之殺也與青青子衿同義孤子以素者無事乎飾也袂緣者袂與緣也衷口謂之袂裳下謂之緣衣側謂之邊其純皆寸半三

五之數也

禮記集說卷一百四十五